

A 124

1978

L

183 1



A. 124.

Arroyale Disziplin

ou  
Nr

Einiconis Lobgesang/

Lu: 2.

Kurz ausgelegt:

Bev der Christlichen  
Begrebnus/des Edlen/Ehrnuesten  
vnd gestrengen LVDOLFS  
von Schadertz.

Am Contag Exaudi den 12. May/

Anno 1583.

Durch

M. Hieronymum Mencilium Mans.  
feldischen Superintendenten.



Gedruckt zu Eisleben durch  
Andream Petri.



78 L 1831

AR

210



Der Edlen/ vnd Ehrn-  
thugentfamen Fräwen/ Sybilla gebor-  
ner Spiegelu/ Ludolffs von Schaderitz seligen/ hin-  
derlassenen Witwe/ Vnd den auch Edlen/ Ehren-  
sten vnd Bestrengen Sabtan/ vnd Wolff Ditterich von Scha-  
deritz/ gebrüderu/ etc. Meiner groszgünstigen Fräwen/  
vnd Jungfern.

Gottes gnade/ Segen vnd Trost/ von vn-  
serm Herrn Ihesu Christo/ durch den  
heiligen Geist: zuvor.

**D**ie Ehrnthugentfame Fräw/  
auch Edle/ Ehrnueste vnd ge-  
strenge Jungfern/ Es haben  
e. Thugent/ vnd G. an mich begeren las-  
sen/ das ich die Predigt/ so durch Got-  
tes gnade/ bey der Christlichen begreb-  
nis ewres lieben Jungfern/ vnd Bru-  
dern geschehen/ schriftlich fassen/ vnd  
euch mittheilen wolte. Biewol ich dar-  
zu wenig zeit gehabt/ habe ich doch e. T.  
vnd G. zu wilfahren nicht abschlagen  
wollen. Uberschicke der wegen e. T. vnd  
G. sol

G. solche predigt/ so gut sie der liebe Gott  
verlihen hat. Vnd ob ich wol selbs er-  
kenne/das sie zum offentlichen druck zu  
schlecht vnd einfeltig sein möchte / so ist  
sie doch gleichwol aus Gottes wort ge-  
nomen. Derwegen stelle ichs e. L. vnd  
G. anheim/ das sie es mit derselbē nach  
irem wolgefallen machen. Vnd wun-  
sche von Herren / das sie e. L. vnd G.  
vnd allen so sie lesen möchten/tröstlich  
vnd wolgefellig sein möge. Hiemit be-  
felhe ich e. L. vnd G. in die gnade vnd  
schutz des Almechtigen: Eisleben/den  
13. Maij/ Anno 1583.

Hieronymus Mencilius  
Superintendens.



Simeo.

# Simeonis Lobge- sang Luce 2.

**D**A die Eltern / das kind Ihesum in  
den Tempel brachten / das sie für  
in theten / wie man pfleget nach dem  
Gesetz / Da nam Simeon das Kind  
auff seine Arme / vnd lobete Gott / vnd  
sprach :

**H**ERR / nu lesestu deinen Diener  
im friede fahren / wie du gesagt hast.

Denn meine Augen haben deinen  
Heyland gesehen.

Welchen du bereitet hast / für allen  
Völcker.

Ein Licht zu erleuchten die Heiden /  
vnd zum preis deines Volcks Israel.

**D**ieses ist das kurtze vnd schöne Lobgesang  
lein / des lieben alten SIMEONIS / der sich  
viel fromer Christen / in irem seligen Abschied /  
aus diesem Leben (wie auch vnser seliger lieber Jung-  
herr)

herr) getröstet haben. Vnd ist wol werd/das es  
noch stze von allen Christen mit fleis gelernet/vnd  
gemercket werde.

Es ist aber von diesem Liedlein/die Summa/  
Das Simeon vnserem lieben **HERN** Gott hertz  
lich dancket/für den gegebenen Messiam/Welchen  
er beydes aus erleuchtung des heiligen Geistes im  
glauben erkennet. Vnd mit seinen leiblichen Augen  
gesehen/vnd auff seinen Armen getragen hat. Vnd  
bittet darauff vmb ein gnediges Stündlein/zum sel  
ligen abschiede aus diesem Leben. Denn weil er den  
**HERN** gesehen vnd erkennet/auff welchem/sein/  
vnd aller Menschen Weil stehet/durch welchen der  
Himmel geoffnet/vnd der weg zum ewigen Leben be  
reitet ist/so begere er in diesem mühseligen Leben/  
lenger nicht zu bleiben.

## C A T E C H I S M V S.

Damit weist vns Simeon in vnserem heiligen  
Catechismo/Erstlich/in den andern Artickel vnser  
Christlichen glaubens/darinne die lere von der Per  
son/Ampf vnd Woltthaten des Messia fürgetragen  
wird/welches er alles auff das gegenwertige Kind/  
**I H E S V M C H R I S T V M** zeucht/Das dasselbe/wie  
es Gottes vnd Marien Sohn ist/der verheiffene  
Weybesame seye/der der Schlangen den Kopff  
zutretten/das ist / des Teuffels reich zerstören/alle  
Menschen aus seiner gewalt erretten/vnd durch sein  
zukünfftiges verdienst/zu ewigem Weil vnd Selig  
keit helfen werde.

Er führet vns auch in den dritten Artickel des  
Vater

Glaubens/ vnd in die letzte Bitte des heiligen Va-  
ter vnser/ denn er zeigt die/ mit starckem glauben/  
das ein ander ewiges/ vnd bessers leben/ den dieses  
itzige hie auff Erden ist/ dahinden sey/ darein wun-  
schet er/ vnd leret vns auch/ nach des HERRN Chris-  
ti anweisung teglich bitten/ Erlöse vns von dem  
vbel. Auff das wir deste eher zu dir/ lieber Gott/ in  
dein Himelreich komen/ vnd ewiger freude theil-  
hafftig werden. Wie den vnser lieber Lutherus auch  
teglich ein solch Gebetein gehabt/ darinne er Gott  
für seine Wohlthaten gedancket/ vnd vmb ein Seli-  
ges ende gebetet/ hat. Welch Gebetein billich alle  
Christen lieb haben/ vnd teglich gebrauchen solten:  
Es lautet aber also.

**I**ch dancke dir mein himlischer Vater/ für alle  
deine Wohlthaten/ die du mir erzeiget hast/ das  
du mich hast geschaffen/ zu einem vernünfftigen  
Menschen/ vnd hast mich erlöset/ durch das vn-  
schuldige Blut/ deines lieben Sohns/ meines lieben  
HERRN vnd heilandes Ihesu Christi/ vnd hast mir  
solches durch den heiligen Geist/ in deinem Wort  
lassen anzeigen/ vnd verkündigen/ Ich bitte dich/  
mein lieber Vater/ verleihe mir deine gnade/ dein  
heiliges Wort wol zu lernen/ Christlich dar-  
nach zu leben/ vnd selig darauff zu Ster-  
ben/ durch Ihesum Christum deinen  
lieben Sohn vnsern HERRN/  
A M E N.

Sprü.

## Sprüche:

Weil aber der liebe Simeon / sein Liedlein nicht  
aus seiner vernunft erdacht / Sondern durch einge-  
ben des heiligen Geistes / aus der heiligen Schrift  
genommen hat / so sollen dieselben Sprüche / in wela-  
che Simeon gesehen hat / mit fleiß gemercket vnd  
hieher gesetzt werden. Also aber haben der Pro-  
phet Moses vnd Esaias / von dem WERN Ihesu  
Christo / viel hundert Jar für seiner Geburt / geweiß-  
saget: Gen. 22. Spricht Gott der WERN zu Abra-  
ham: Durch deinē Samen / sollen alle Völcker auff  
Erden / gesegnet werden / nicht nur das einige volck  
die Juden / Sondern alle Völcker / wie viel jr auff  
Erden sein vnd wonen / dieselben alle des Messia ge-  
niffen / vnd seines Segens theilhaftig werden.

Esaie 49. Es ist ein geringes / das du mein  
Knecht bist / die stemme Jacob auffzurichten / vñ das  
verwarlosete in Israel wider zu bringen / Sondern  
ich habe dich auch zum Liecht der Heiden gemacht /  
das du sehest mein Heil / bis an der Welt ende.

Wie nu in diesen Sprüchen von dem Messia ge-  
saget ist / das er alle Völcker segnen / die Heiden er-  
leuchten / vnd aller Menschen Weiland sein werde /  
Also zeuhet es Simeon alles auff das gegenwertige  
Kindelein / das er auff seinen Armen helt / vnd zeuget  
von jme nichts mehr oder weniger / denn zuvor die  
Propheten gethan haben. Das were Kurtz von der  
Summa des Lobgesangs Simeonis / wo hin er in  
vnserm Catechismo gehöre / vnd woher er genommen  
sey.

Theil.

## Theilung der predigt.

Was aber die Auslegung dieses Lobgesangs anlanget / wollen wir dieselben in zwey stücklein fassen.

Zum Ersten / ein wenig von dem lieben Simeon berichten / wie er von dem Euangelisten Luca / in dem fürgehenden Text beschriben ist / Vnd warumb es geschehen seye.

Zum Andern / wollen wir zu dem Lobgesange greiffen / vnd sehen / Was vns der liebe Simeon in demselben lere.

Unser lieber Herr Ihesus Christus / der da ist das ware Licht / welches alle Menschen erleuchtet / Johan. 1. 9.  
so in diese Welt komen / erleuchte auch unsere Herzen / mit seiner gnade / das wir in auch / wie der liebe Simeon / als unsern Heiland erkennen / vnd preisen / vnd nach dem Finsternis dieses Lebens zu ihm / in sein ewiges Licht vnd Klarheit komen / vnd selig werden. Das helffe vns / unser lieber Herr Ihesus Christus / sampt dem Vater / vnd heiligen Geiste / warer Gott / gelobet in ewigkeit / Amen.

## Vom Ersten.

Was den lieben alten Simeon anlanget / Sagt S. Lucas in dem fürgehenden texte / vierley von ime.

Erstlich / das er zu Iherusalem gewonet / vnd ein frommer / vnd Gottfürchtiger Man gewesen ist. From ist er / von wegen des Glaubens an unsern

**B**

**DEIN**

**D**Ern Ihesum Christum. Auffer dem Glauben/  
sind alle Menschen in sünden/verlorn vnd verdampft/  
Do sie aber solch jr Elend/mit Busfertigem hertzen  
erkennen/vnd an Christum glauben/das er in/durch  
sein Leiden vnd Sterben/vergebung der Sünden  
erlanget/vnd sie mit Gott dem himlischen Vater ver-  
sönet hat/werden sie in Christo für Gott from/vnd  
gerecht. Denn Gott rechnet in seines Sohnes ver-  
dienst vnd Berechtigkeit zu/ als were sie jr eigen.  
Psam. 32. Rom. 4. Gottfürchtig ist er/weil er aus  
warem glauben Gottselig lebet/Wie der Euangelist  
Pertz zuuor/von dem lieben Zacharia/vnd seiner  
Elizabet schreibt. Sie waren alle beyde from für  
Gott/vnd giengen in allen Gebotten/vnd satzun-  
gen des **D**ERN vntadelich/Luce 1. Das heisse  
Gottfürchtig sein/wen man nach Gottes Gebotten  
lebt vnd wandelt/vñ sich fürchtet wider dieselben zu  
handeln/Wie sich frome Kinder fürchten irer Eltern  
willen zu vbertreten. Den die sind auch Gottes Kin-  
der/welche der Geist Gottes zu gutē treibet/Rom. 8.  
Zum Andern/sagt S. Lucas/von dem lieben Si-  
meone/das er auff den trost Israels gewartet habe/  
das ist/ Er hat ein hertliches verlangen nach dem  
Messia/vnserem **D**Ern Ihesu Christo getragen/  
den nēnet er alhie Israels trost/das ist/den **D**Ern/  
des sich Israel/vñ alle Israeliten/Nemlich/die glen-  
bige Christen alleine trösten vñ frewen können/den in  
ime vñ auff ime/stehet aller Menschen heil/vñ trost.  
Zum Dritten/saget S. Lucas/das Simeon  
den h. Geist gehabt/der in ime gewesen/das er ein  
Tempel vnd Wohnung des h. Geistes ist/das ist/ein  
hohes treffliches lob/des lieben Simeonis/Das  
in

in Gott der **DEUS** mit seinem Geiste erleuchtet/  
vnd regieret hat.

Es ist aber Simeon zu solcher Erleuchtung vnd  
Inwonunge des h. Geists / durch keinen andern  
weg komen / denn das er mit allem fleis die heilige  
Schrift gelesen vnd gehöret / Vnd in ernster anruf-  
fung Gottes / auff den Messiam gehoffet / Sonder-  
lich aber hat er die Weissagung des Patriarchen Ja-  
cobs / vñ die Jarrechnung des Propheten Daniels /  
von der zukunfft des Messie / betrachtet / vnd den zu-  
standt des Jüdischen Regiments / wie dasselbe in  
fremde Dende komen were / dagegen gehalten. Vnd  
also daraus die rechnunge gemacht / Es müsse der zu-  
gesagte Weltand der Welt nicht weit sein. Dieses  
hat der h. Geist in ime bestettiget / vnd solch Licht  
angezündet / das er sich gentslich versehē hat er wer-  
de / vnd wolle / noch denselben Weltand selbs zuse-  
hen bekommen. Das meint S. Lucas / do er sa-  
get / das Simeon von dem heiligen Geist eine ant-  
wort worden sey / er solte nicht ehe Sterben / er bet-  
te denn zuuor / den Christ des **DEI** gesehen. Dies-  
ses (sagt Lutherus) ist nicht ein blosser gedancke ge-  
wesen / Wie wir oft bloße gedanken von einem  
dinge fassen / vnd es so gereth / Sondern eine son-  
derliche erleuchtung des heiligen Geistes / das er  
gewis dafür gehalten hat / es würde ime nicht fey-  
len / er würde den Messiam mit leiblichen Augen /  
hie auff Erden / bey seinem Leben sehen / Weil es  
an deme das die Schrift erfüllet / vnd alles zum  
ende / nach derselben gelauffen were / das nu nichts  
mehr vbrig sein könne / denn das sich der Messias  
selbs einstelle.

B ij

Darauff

Darauff gehet vnd komet das Vierde/das S.  
Lucas anzeiget/das Simeon aus anregen des inwo-  
nenden h. Geistes in den Tempel komen ist/Vnd als  
die Eltern/das Kind Ihesum/nach dem Göttli-  
chen Gesetze/dem **DEKUN** fürstellen/do erkenn-  
net es Simeon für den rechten vnd waren Messiam.  
Vnd singet von ime/das herrliche Liedlein/in wel-  
chem er die höchste dinge von ime rühmet/wie wir  
bald hernach hören sollen.

Das ist kurtz das Erste stücke/bey welchem die  
Frage für fellet: Was wol den Euangelisten Lucam  
bewogen vnd verursacht habe/diese dinge/mit sol-  
chem grossen fleisse/von Simeone zuschreiben? Dar-  
auff ist die antwort/das es vmb dreyer wichtiger ur-  
sachen willen geschehen ist.

Erstlich/wil er damit auff den zustand der Kir-  
chen weisen/wie es dazumal im Judischen volcke ge-  
standen ist/Das wenig Leute gewesen sein/die sich  
vmb den Christ des **DEKUN** angenommen haben.  
Der grosse hauffe der hochgelerten/der Weisen vnd  
Wichtigsten/seind nicht allein voller Blindheit/son-  
dern stecken in grewlicher Epicurischer sicherheit/  
das sie nach nichts mehr fragen/denn nach zeitlicher  
vnd vergenglicher Ehre vnd Herrlichkeit/welchen  
der Bauch jr Gott ist/vnd sitzen doch im Kirchen  
Regiment/wollen auch kurtzumb den Namen/vnd  
die Ehre haben/das sie die rechte Kirche sein. Nu  
ist aber solcher jr Rham falsch vnd vnrecht. Denn  
nicht die Prelaten zu Jerusalem/sondern die armen  
Gottfürchtige Leutlin/Maria vnd Joseph/der alte  
Simeon vnd Anna/die Dirten vnd Weisen aus  
Morgenland/vnd sonst garwenig Gottfürchtige  
Leute

Leutlin seind alleine / dasmal die rechte ware Kirche  
Gottes / vnd derselben lebendige Bildmasse.

Dieses wil der Euangelist wol einbilden / zur  
Ere vnd Trost / das wir nicht dencken sollen / das  
die Kirche Gottes auff grossen Leuten stehet / noch  
an die prechtigen Tittel gebunden ist / Sondern wo  
Leute sein / die Gottes wort recht leren / vnd liebha-  
ben / vnd aus demselben / den Heyland Ihesum  
Christum erkennen / vnd auff in allein allen Trost  
vnd Hoffnung der Seligkeit richten vnd setzen / da  
ist die ware Kirche / do ist vnd wonet Gott / Es mö-  
gen die Leute so wenig vnd geringe sein / als sie jma-  
mer wollen.

Zum Andern / wil S. Lucas an dem lieben Si-  
meone / einen wolbeglebten zengen / von dem Mes-  
sia fürstellen. Darumb beschreibet er in mit solchem  
fleisse / vnd bildet sonderlich das von jme wol ein /  
das er mit dem heiligen Geiste erleuchtet ist / das  
man sein zeugnis / nicht als eines alten kindischen  
Mannes rede / sondern als ein gewisse vnwandelba-  
re anweisung des heiligen Geistes halten soll / durch  
welche niemand betrogen werden kan. Sondern  
wer nach solcher anweisung das Kind Ihesum an-  
men / vnd für seinen vnd aller Welt Heyland halten  
wird / der wird recht antreffen / vnd warhafftig selig  
werden.

Zum Dritten / wil vns S. Lucas an dem lieben  
Simeon ein sein Formular fürstellen / wie man Gott  
selige Leute rühmen vnd ehren soll / nicht das man  
sie / wie die Papisten leren / zu fürbittern auffwerffen  
sol / Sondern auff iren Glauben sehen / aus dem-  
selben / sol man sie für selig richten / vnd jrem guten  
wandel //

wandel / in der Gottseligkeit nachfolgen / Das sie  
vns mit irem Exempel besserung des lebens dienen  
vnd nütze sein. Weiter gebüret vns nicht zu gehen.  
Vnd das ist also das erste in dieser predigt / von dem  
lieben alten Simeon.

## Vom Andern.

Was Simeons Lobgesang anlanget / so theilt  
sich derselbe in zwey theyl. Im ersten / ist sein Ge-  
bete / vnd dancksagung für den gegebenen vnd erken-  
nen Messiam. Das andere ist die beschreibung des  
Messie / vnd erzehlung seiner wolthaten / welche er in  
drey Namen / so er jme gibet / fasset. Das erste / stehet  
in diesen worten.

**HERR** / nu leffestu deinen Diener im fride  
fahren / wie du gesaget hast.

Simeon nennet sich des **HERREN** diener / da-  
mit verstehet er den rechten waren Gott / Gott den  
Vater / seinen Sohn Ihesum Christ / vnd den heilli-  
gen Geist. Demselben waren Gott dienet Simeon /  
also / das er auff den verheiffenen Weiland hertzlich  
gehoffet hat / vnd weil er itzt denselben auff seinen  
Armen für sich hat / ist hertzlich froh / Vnd preiset  
mit seiner hertzlichen freude / Gottes vnansprechli-  
che güte / das er seine zusage trewlich gehalten / vnd  
den Weiland der Welt gegeben / vnd gesendet hat.  
Das ist eins von Simeons Gebete. Denn Gottes  
wolthaten erkennen vnd rühmen / heisset jme danck-  
bar sein / welches Gott von allen Menschen fodert /  
vnd haben wil / Psalm. 50. **DAS**

Das ander aber / als das Gebete / das Simeon  
hie that / Ist / das er auch Hertzlich seuffzet vnd bit-  
tet / das in der DERXEN seiner vertroöstung nach / selig  
vnd fridlich / aus diesem Leben wolle abscheiden las-  
sen. Denn weil er ime durch den heiligen Geist zuges-  
saget / das er als denn erst sterben solle / wenn er den  
Heiland / vnd Christ des DERXEN gesehen hette /  
vnd er nu denselben jetzt hette vnd sehe / so solle er  
in mit gnaden aus diesem elenden vnd müheseligen  
Leben abfodern / das ist seines hertzen einiger wun-  
sche vnd begierde.

Hie felt abermal eine wichtige frage für.

Wie Simeon darzu komme / das er im den todt  
wunschet / vnd denselben hertzlich begeret / vnd da-  
mit anzeiget / das er sich für keinem todt fürchte  
noch endsetze / so es doch Natürlich ist / einen ab-  
schewe für dem todt haben?

Auff diese frage gibet vns Simeon die ant-  
wort selbs / do er die vrsache anzeiget / warumb er  
solches begere / vnd was in so mutig gemacht habe:  
Do er also spricht.

Denn meine Augen haben deinen Heiland gese-  
hen / welchen du bereitet hast für allen Völkern.

Darumb saget Simeon / begere ich zu sterben /  
weil ich nu den DEREN gesehen / vnd erkennen hab /  
der mein vnd der gantzen Welt Heiland ist. In wel-  
chen der todt kein todt / Sondern ein Schlaf / vnd  
ein gewisser durchgang ist / zu dem seligen / ewigen /  
frenden Leben / welches vns dieser Heiland erlanget  
vnd erwirbet.

Es

Es redet aber hie Simeon mit seinen herrlichen  
worten / aus eingeben des heiligen Geistes / von vn-  
serem lieben **HERN** Ihesu Christo / Deme er / wie  
gesagt / drey schöne Namen gibet / vnd in denselben /  
die aller höchsten wolthaten erzelet / welche man von  
ime entpfehet. Vnd damit sehet das ander stücke /  
in Simeons Lobgesang an.

Der erste Name des Messie ist / das er **Weyland**  
heisse / Wie er auch in seiner Geburt / von den heiligs-  
gen Engeln Gottes also genennet wird. Es nennet  
jn aber Simeon erstlich in gemeine / einen **Weyland** /  
darnach sagt er darzu / Gottes **Weyland** / den er bes-  
reitet vnd verordnet hat. Zum dritten aller völkter  
**Weyland**.

Das er jn in gemein einen **Weyland** nennet / zeig-  
get er an / das er ein gewisser vnd starcker **Welfer**  
sey / der **Weyl** vnd **Wülffe** habe vnd brenge. Doch  
nicht ein solcher **Weyland** / wie Moses war / do er die  
Kinder Israel / durch Gottes hand / aus Egypten  
vnd durch das rotte Meer führet / vnd jn aus Pha-  
raonis / vnd der seinen tyranney halffe. Auch nicht  
wie Gedeon / David / vnd andere treffliche helden /  
des Volcks **Weylande** gewesen / do sie jre Feinde ges-  
schlagen / vnd die jren aus jrer macht los gemacht ha-  
ben. Sondern er ist ein **Weyland** vnd **Welfer** / in viel  
höhern vnd schweren nöthen. Denn diesem **Wey-**  
**lande** sein fürbehalten / die **Sünde** / der **Todt** / **Welle**  
vnd **Teuffel** / welche durch den fall der ersten Mens-  
chen / vber das gantze Menschliche geschlecht macht  
vnd gewalt bekommen haben. Aber dieser **Welfer**  
kan / sol vnd wil / alleine von jn helfen. Die **Sünde**  
thut er abe / durch sein Leiden vnd Sterben / denn  
sein

sein Blut vergenst er zu vergebung der Sünden/  
das sie den Bleibigen / vmb seines willen verge-  
ben / vnd dagegen die Gerechtigkeit / die für Gott  
gilt zu gerechnet werde / 2. Corinth. 5.

Dem Todte / benimpt er / durch seinen Todt /  
alle sein Recht / Macht / vnd Krafft / das er in zu ei-  
nem Schlaff der seinen machet / aus welchem er sie  
zum seligen ewigen Leben erwecke.

Die Welle zerstöret er / die Verdammis hebt er  
auff / das die selbe an den seinen nichts schaffen kan / Rom. 8  
Denn es soll heißen: Nulla nunc condemnatio his, qui  
sunt in Christo Iesu / Es ist nichts verdamlichs an de-  
nen / die in Christo Ihesu sind / etc.

Den Teuffel hat er auch also vberwunden / das  
er in vnter seine Füße / zum Schemel leget / mit Ket-  
ten der Finsternis gebunden helt / bis er in endlich en /  
mit seinem gantzen Gottlosen hauffen / in die ewige  
Finsternis stürzte. Denen wird der Herr Christus  
je billich / vnd mit allem rechte / ein Heiland vñ Helf-  
fer genennet / als der do hilfft vnd helfen wil vnd  
kan / do aller Menschen hülffe aus / vnd nichts ist.

Er nennet in aber Gottes Heiland / welcher  
von Gott zum Helfer vnd Heiland gesetzt vñ berei-  
tet ist. Damit zeiget Simeon an / Woher dieser Helf-  
fer komme / Er wirfft sich nicht selber darzu auff /  
Sondern von Gott ist er darzu bereitet / Denn im  
Rath der h. Dreyfaltigkeit / ist also beschlossen / das  
der Sohn Gottes solie Mensch werden / vnd der  
Mittler zwischen Gott vnd den Menschen sein / Das  
er Gott versöhne vnd den Menschen von der Sünde /  
Gottes zorn / des Gesetzes Fluch vnd ewiger ver-  
dammis helffe.

E

Das

Was in aber Gott gesetzt / So hat er auch auff  
in alleine alle hülffe geleget / Das wer im geholffen  
haben wil / dasselbe niergent / denn allhie bey diesem  
Weiland vnd Helffer suche. Wie S. Petrus auch  
hieher sihet / Actor. 4. vnd 10. Da er spricht / Es  
ist kein ander Namen gegeben / in welchem geholff  
fen werden könne / denn der Namen Ihesu Christi /  
von welchem alle Propheten zengen / das in seinem  
Namen vergebung der Sünde empfahen / alle so  
an in glauben / Wo man aber der Sünden loß ist /  
da mus alle straffe der Sünden als / Todt / Teuffel /  
Helle / vnd ewige Verdammnis / nichts schaffen vnd  
ausrichten.

Zum dritten sagt Simeon / ist dieser Weiland  
nicht alleine für die Jüden / Sondern für alle Völ-  
cker bereitet. Das ist ein grosser trost / das niemand  
weder Jüde oder Heide / weder klein oder gros /  
Weib oder Man / von diesem HERRN vnd seinem  
Weil vnd Hülffe sol ausgeschlossen sein / ohne der  
sich selbst / durch vnglauben / vnd mutwillig böse le-  
ben ausschleußt. Do ist S. Peters Regel auch war /  
Aktor. 10. Au erfahre ich mit der warheit / das Gott  
die Person nicht ansihet / sondern im allerley Volck /  
wer in fürchtet vnd recht thut / der ist ime angenehme.

Das ist also der erste Name / des HERRN Chris-  
ti / in welchem Simeon anzeiget / was in so mutig  
mache / das er zu Starben beger / Er hat den HERR-  
ren gesehen / der sein vnd aller Welt Weiland ist /  
darumb darff / vnd soll er sich für dem todte nicht  
fürchten / denn dieser Helffer wird in aus des Tod-  
tes gewalt erretten / vnd zum ewigen Leben führen.  
Die

Die lernen wir: **Erflich** / Was sich alle Menschen / die zeit ihres Lebens zum höchsten beflüssigen solien / **Nemlich** / das sie diesen Weiland auch sehen vnd recht erkennen lernen. **Simeon** hat in zweyerley weise gesehen / **Leiblich** vnd **Geistlich**. Das **Leibliche** sehen / hette in wenig geholffen / wenn er in nicht **Geistlich** / aus erleuchtung des heiligen Geistes erkennen hette. Wie es denn die **Juden** nichts geholffen / **Sondern** viel mehr verdammet hat / das sie **Christum** **Leiblich** gesehen / vnd darüber verachtet haben. **Uns** sol genug sein / das wir in **Geistlich** sehen / vnd erkennen lernen. Wie der **DErr** **Christus** davon selbs zu **Thoma** spricht / **Johan. 20.** Weil du gesehen hast **Thoma** / so glaubstu / **Aber** selig sind / die nicht sehen / vnd doch glauben. Als wolte er sagen / **Wens** am **Leiblichen** sehen gelegen were / **So** würden alle die nach dir kommen werden / vbel bestehen. **Aber** wer an mich glaubet vnd mich aus meinem Worte recht erkennet / der kan vnd sol auch gewislich selig werden.

**Zum** **Andern** / lernen wir / wie man zu solchem heilsamen sehen / vnd erkenntnis **Christi** komme? die rechte mittel seind dazu / das **Göttliche** wort / das **Euangelium** von **Christo** **Ihesu** / vnd seine hochwürdige **Sacramenta** / von welchem die auslegung des dritten **Artickels** sagt / **I**ch glaube das ich nicht aus eigener Krafft an meinen **DErrn** **Ihesum** **Christum** glauben / oder zu jme kommen kan / **Sondern** der **h. Geist** hat mich durchs **Euangelion** beruffen / vñ mit seinen Gaben erleuchtet vnd geheiligt / vñ zum rechten glauben an **Ihesum** **Christum** bracht / vnd darinnen erhalten. **Daran** halte si **h** wer auch **Christum** erkennen / vnd in jme selig werden wil. Zum

Zum Dritten/ ist die lere von der rechten Sterb-  
bekunst/ in diese wort gefasset/ do Simeon spricht/  
seine Augen haben Gottes Weiland gesehen/ denn  
do ist erst recht vnd gut Sterben/ wenn Ihesus Chris-  
tus erkennet ist/ zuvor vnd ohne das stirbet sichs  
vbel/ wenn man Christum nicht hat zum helffer von  
Sünde/ Todt vnd ewiger Verdammnis. Wenn man  
aber den DERN recht erkennet/ vnd sein hertzlich es  
vertrauen auff in gesetzt vnd gestellet hat/ So heis-  
set es denn wie die Offenbarung Johannis am 14.  
Capitel saget: Selig sind die Todten die im DERN  
sterben/ das ist/ die im Glauben an den DERN  
Christum sterben/ sie rugen von irer arbeit/ das ist/  
sie kommen zur seligen ruhe von allem Jammer vnd  
Glende/ so höret in im auch die leidige Sünde auff/  
das sie dieselben nicht anfechten kan/ Ire Wercke  
folgen inen nach/ Man rühmet iren Glauben vnd  
Gottseligkeit/ der sollen sie auch in jenem leben genis-  
sen/ vnd danon Ehre vnd Ruhm haben/ Wie der  
DERR Matth. am 25. anzeiget.

Der ander Name/ welchen Simeon dem Kind-  
lin Ihesu Christo gibt ist/ das er in das Licht der  
Weiden nennet. Solchen Namen nimet er/ wie an-  
fenglich vermeldet ist/ aus dem 49. Capitel Esaies  
Damit zeiget er zweyerley an/ Erstlich wie es vmb  
die Weiden/ ja alle Menschen aussen Christo stehet/  
Sie sind vnd ligen alle in tieffer greulicher Finster-  
nis/ das sie weder von Gottes Wesen oder Willen  
etwas wissen. Denn weil sie Gottes Wort nicht ha-  
ben/ so können sie auch von Gott nichts wissen. Zu  
dieser Finsternis gehöret auch die greuliche Abgöt-  
terey/ das die Weiden/ den waren Gott so sie nicht  
erken-

erkennen/ verlassen/ vnd inen selbs Götter auffge-  
worffen / vnd ertichtet haben/ denen haben sie nach  
irem gutduncken gedienet. Item die vielfaltige sün-  
den/ darinnen sie nach iren lusten gewandelt/ keine  
vnreinigkeit geschewet wie S. Paulus zu den Römern  
am 1. Capitel danon schreibt. Das sagt hie Simeon  
von den Heyden das sie in eitel Finsternis ge-  
stecket.

So ist das andere / Wer hilfft den Heyden  
daraus/ vnd wie bringet ers zuwegen? Darauff ant-  
wortet Simeon / das es vnser liebes Kind Ihesus  
Christus thut/ Das ist das Licht/ das die Heyden  
erleuchtet/ vnd aus dem greulichen Finsternis / zur  
rechten erkentnus Gottes führet vnd bringet. Sol-  
ches aber thut er durch sein heiliges Wort/ das ist  
das Mittel / dadurch alle Menschen zu Gottes er-  
kentnus geführt werden/ Dabey ist der heilig Geist  
krefftig/ das er den Glauben vnd Erkenntnis Gottes  
anzündet/ Wie zu den Römern an 10. steht/ Der Glau-  
be kompt aus dem gehöre des Göttlichen worts.  
Wie wier auch aller nechst danon aus der auslegung  
des dritten Artickels gehöret haben.

Den dritten Namen/ welchen Simeon dem  
HERRN Christo gibet/ setzet er in diese worte.

Zum preis seines Volckes Israel.

Wie sol man nu das verstehen? Antwort.  
Nur bloss von dem efferlichen rhome/ vnd fürzug  
der Juden/ welchen die Heyden für den Heyden has-  
sen. Weil sie rühmen vnd sagen können/ der Mes-  
sias sey inen am aller ersten / vnd für allen Heyden.  
C. liij. verheiß

verheiffen vnd zugesaget / auch aus irem Geblüt  
vnd Stamm herkommen / vnd geboren würden / etc.  
Von solchem Preis redet hie Simeon nicht eigent-  
lich / Sondern von der aller höchsten vnd größten  
wolthat / danon Esaias sagt / Das er das gefallene  
in Jacob auffrichte / vnd das vermarlosete in Israel  
zu rechte bringe / das ist / Das er die Juden / so wol  
als die Heiden / die sich bekehren / zu genaden auff-  
neme / vnd Selig mache. Denn ob wol / spricht Lu-  
therus / Gott dis Volck (die Juden) mit seinem  
Wort / Gottes dienst / vnd allerley gaben geziere  
habe / So hänge doch dieser Unflat noch immer an  
inen / das sie in Sünden vnd vnter dem todt lagen /  
Vnd sie inen selbs daraus nicht helfen kundten / sol-  
che schande war weit mehr vnd gröffer / denn jene  
eufferliche ehre. Danon spricht Simeon die Juden  
haben bisher eine ehre gehabt in der Welt / für al-  
len Heiden / Aber es ist eine geringe ehre gegen dem  
schaden / der noch auff ihnen liget / Nu aber sollen  
sie recht zu ehren kommen / das sie nicht alleine auff  
Erden / eine zeitlang / Sondern auch im Himmel  
sollen ewig Gottes volck sein / durch diesen Wei-  
land. Das meinet eben Esaias auch / do er sagt /  
Christus sol Jacob auffrichten / vnd Israel wider  
herzu bringen. Huc vsq; Lutherus.

So ist nu dieses das ander stücklein in Sime-  
ons Lobgesange / von den schönen herrlichen Na-  
men des WERREN Ihesu Christo / Aus welchem wir  
zu lernen haben.

Erstlich / Was für einen trefflichen WERREN /  
wir an vnserem WERREN Ihesu Christo haben /  
Nemlich / der ein WERREN vnd Helfer ist in allen  
nöthen / der alle Menschen zum rechten Liecke vnd

Erkenntnis Gottes bringen/ vnd alle die an ihn glauben/ mit dem höchsten preis vnd schmuck/ zieren kan/ das sie Gott im Himmel wolgefallen/ ob sie wol ihres schwachen Fleisch vnd Blutes halben noch arme gebrechliche Menschen sein.

Zum Andern/ Weil nu aller Menschen Heil vnd Trost/ jr Liecht vnd Leben/ auff diesen einigen Weiland gesetzt vnd gegründet/ so stehet es auff einem guten festen vnd unbeweglichen grunde/ welchen weder Sünde/ Todt oder Teuffel umbreissen können/ Matth. 7. Ja hier ist nu die lere von vnser Recht fertigung für Gott/ sein klar vnd deutlich dargegeben/ Das wir durch keinen andern weg gerecht werden für Gott/ denn das wir an diesen Weiland glauben/ vnd vns auff verdienst kündlich verlassen. Daron schreibt S. Paulus herrlich/ Rom. 3. Die ist kein vnterscheit (zwischen Juden vñ Heiden) Sie sind allzumal Sünder/ vnd manglen des Ruhms/ den sie an Gott haben solten/ vnd werden ohne verdienst gerecht/ aus seiner gnade/ durch die erlöschung/ so in Christo Jesu geschehen ist/ welchen Gott hat fürgestellet zu einem Gnadenstuel/ durch den Glauben in seinem Blut/ damit er die Gerechtigkeitt darbiete/ die für ime gilt/ in dem das er die Sünde vergibet/ etc.

Zum Dritten/ Dat vns nu Gott mit einem solchen trefflichen Weilande vnd Helfer versehen/ welcher sein einziger Sohn in einer person/ Gott vnd Mensch ist. So zeuget er genugsam/ das er vns warhafftig liebe/ Johannis am 3. Vnd das er vns in keinem wege verlassen könne noch wolle/ Daraus wir den Muth schöpfen vnd fassen sollen/ welchen

den hie Simeon hatt / das wir vns für keinem Cren-  
tze / vnd für dem Todt selbs nicht fürchten noch ent-  
setzen. Sondern mit S. Paulo frölich vnd getroßt  
rühmen vnd sagen können / Rom. 8. Was wollen  
wir sagen? Ist Gott für vns / wer mag wider vns  
sein? welcher auch seines eignen Sohns nicht ver-  
schonet / Sondern hat in für vns alle dahin gege-  
ben / Wie solt er vns mit ime nicht alles schencken?  
Wer wil die Anserwelten Gottes beschuldigen?  
Gott ist hie / der da Berecht macht. Wer wil ver-  
dammen? Christus ist hie / der gestorben ist / ja viel  
mehr / der aufferwecket ist / welcher ist zur rechten  
Gottes vnd vertritt vns.

Wer wil vns nu scheiden von der Liebe Got-  
tes / Trübsal oder Angst / oder Verfolgung? oder  
Dunger / oder Blöße? oder Fehrligkeit? oder  
Schwert? etc. Ich bin gewis / das weder Todt noch  
Leben / weder Engel noch Fürstenthumb / noch Ge-  
walt / weder Gegenwertiges noch Zukünfftiges /  
weder Hohes noch Tieffes / noch keine andere Crea-  
tur / mag vns scheiden von der Liebe Gottes / die in  
Christo Ihesu ist vnserm Herrn.

Daraus wir die Vierdte lere nemen / Welche  
auff diesen trefflichen Weiland abscheid / die seind  
vnuerloren / vnd werden in dasselbe ewige himlische  
Leben auffgenommen / dahin der liebe Simeon zu-  
kommen begert / vnd auch gewislich darein komen ist.  
Ober solcher Leute Christlichen abscheidt / soll man  
sich nicht vngedürlicher weise betrüben / Sondern  
Gott dafür dancken / vnd teglich vmb ein solches  
Stündlein / zum seligen abscheid beten / wie Simeon  
mit seinem Gebetlein weiset / vnd der Herr Christus  
im Das

Im Vater vnser zu thun befohlen hat. Das were  
auch Kurtze anweisung im andern stücke/welchem  
frome Christen ferner nachdencken können. Denn  
alles nach der lenge zu erkläerē/wolte viel zeit fodern/  
So ist auch dieser Lobgesang/von andern hoch be-  
gabten Leuten reichlich ausgelegt/ da man sich be-  
richte genugsam erholen kan.

Vnd haben also ewer liebe/ in dieser Predigt/  
von den zweyen fürgenomenen puncten einfeltigen  
bericht gehört. Erstlich/von der Person des lieben  
alten Simeonis/wie derselb beschriben werde/vnd  
warumb solches geschehen ist. Zum Andern/von  
seinem schönen Lobgesange/darinne er von vnser  
rem lieben **HERRN** Ihesu Christo/gantz herrlich  
vnd tröstlich saget/das er aller Menschen/rechter  
vnd einiger Weiland ist/der sie erlenchtet/vnd mit  
seinem verdienste schmücket vnd Zieret/das sie  
durch in/Gott dem himlischen Vater wolgefallen.  
In dieses **HERRN** erkentnis/stehet aller Menschen  
Weil vnd Trost/vnd wer in solchem erkentnis aus  
diesem Leben scheidet/der hat die rechte/selige Stier  
bekunst/das er durch den zeitlichen todt/zum ewi-  
gen leben vnd aller himlischen freude ingebet/vnd  
auffgenommen wird. Darzu helffe vns Gott der **Va-**  
**ter**/vmb seines Sohns Ihesu Christi willen  
durch den heiligen Geist/warer Gott ge-  
lobt von ewigkeit zu ewigkeit/

**A M E N.**

**D**

**Kurtzer**

**Kurzer bericht/wie der  
Edle/Bestrenge vnd Eyrnueste/ Jung-  
herr Ludhulff von Schaderitz / in seiner Schwach-  
heit sich verhalten / vnd getröstet hat / Von dem 25.  
Aprillis / bis auff den 10. Maij / den tag seines  
seligen Abschledes / Anno Christi**

1 5 8 3.

**W**as vnseren im Herrn Christo/  
seliglich endschlaffenen Jungherrn / Ludhulff  
von Schaderitz anlanget / wollen wir jetz von seinem eusser-  
lichen Leben vnd Wandel mehr nicht sagen / denn allen die  
vmb in gewesen / bekant / vnd öffentlich am tage ist. Als  
ein Erbarer vom Adel / hat er sich gegen jederman Auf-  
richtig / Fridlich / vnd Freundlich verhalten / ein still vnd  
eingezogenes leben geführet / vnd hat sich Nüchtern vnd  
Mässig gehalten / vnd dessen was ime nach seinem Beruff  
gebüret / flüssig abgewartet. Vnd in solchem Erbaren vnd  
Christlichem wandel / das Sunffzigste Jar seines alters  
erreicht.

Wie er sich aber in seinem Christenthumb / vnd in sei-  
nem Lager vnd schwachheit verhalten / dauon berichtet / der  
Ehewirdige vnd wolgelarte Herr / M. Fridrich Roth /  
der sein Betheuerer / vnd in seinem Lager viel bey ime ge-  
wesen /

Also:

**Jungherr Ludolff von Schaderitz / ist  
seines Alters 50. Jar gewest. Vnd 16. Jar fridlich mit  
seinem**

seinem Weibe im Ehestand gelebet. Hat sich zum gehö-  
rlichen Göttlichen Worte fleißig / vnd zum hochwürdigen Sa-  
crament zu rechter zeit gehalten / wie er denn noch neulich  
den Sontag Jubilate öffentlich in der Kirchen Commu-  
niert hat.

Vnd nach dem in vnser lieber HERR Gott / mit gros-  
ser vnd gefährlicher Leibes Schwachheit / den Montag  
hernach angegriffen / hat er sind derselben zeit / bis an  
sein Ende / sich oft vnd viel / von mir seinem unwürdigen  
Beichtuater / mit Gottes Wort trösten lassen. Auch  
selbst mit viel schönen Psalmen vnd Sprüchen sich zu  
erösten wissen.

Als :

Psalm. 6 Ach HERR straff mich nicht in deinem zorn / etc.

Psalm. 23 Der HERR ist mein hirt / etc.

Psalm 25. Die angst meines Herken ist gros / führe mich  
aus meinen nöthen.

Psalm. 51. Verwirff mich nicht von deinem Angesicht /  
vnd nim dein heiligen Geist nicht von mir.

Psalm. 71. Wenn ich dich nur habe so frag ich nichts  
nach Himel vnd Erden.

Phillip. 1. Christus ist mein leben / Sterbē ist mein gewin.

Rom. 14. Leben wir / so leben wir dem HERRN / Sterben  
wir / so sterben wir dem HERRN / etc.

1. Corint. 1. Ihesus Christus ist vns von Gott gemacht /  
zur Weisheit vnd zur Gerechtigkeit / vnd zur  
Heiligung / vnd zur Erlösung / etc.

Diese vnd viel andere Sprüche / hat er zu vnder schel-  
den malen widerholet / vnd sich in meiner vnd andern ge-  
genwart damit getroestet.

So ich auch auff einen andern tagt zu im komen / vnd  
gefrage / was er doch für fürneme Sprüche hette / damit  
er sich selbst tröstete / die im für andern lieb weren / da erze-  
let er nacheinander diese.

D ij

Jo

Johan. 3. Also hat Gott die Welt geliebet / das er  
seinen eingebornen Sohn gab / auff das alle die an In-  
gleuben/nicht verloren werden/Sondern das ewige Le-  
ben haben/eit.

1. Timot. 1. Das ist je gewislich war / vnd ein thewer  
werdes Wort/das Ihesus Christus komen ist in die Welt/  
die Sünder Selig zu machen / vnter welchen ich der fürs-  
nehmste bin/eit.

Johan 8. Warlich / warlich / ich sage euch / Wer  
mein Wort wird halten / der wird den Todt nicht sehen  
ewiglich/eit.

Rom 8. Ist Gott für vns / wer mag wider vns sein?  
welcher auch seines eigen Sons nicht hat verschont / Son-  
dern hat in für vns Alle dahin gegeben / Wie solt er vns  
mit im nicht alles schencken? Wer wil die Aufferwelten  
Gottes beschuldigen? Gott ist hie / der da Gerecht machet/  
Wer wil verdammen? Christus ist hie / der gestorben ist/  
Ja viel mehr / der auch aufferweckt ist / welcher ist zur rech-  
ten Gottes / vnd vertritt vns. Wer wil vns schelden von  
der Liebe Gottes? eit.

Er sagt er / das ist ein schöner vberaus herrlicher Trosts-  
spruch / Mehr kan ich für mattigkeit / vnd weil mir der Na-  
dem so kurz ist / iht nicht erzelen / wiewol ich ohne Rhum  
zu reden / Gottes wort allewege lieb gehabt / vnd meine  
Bibel fleissig gelesen habe / Wie ich mir denn auch die fürs-  
nehmsten Sprüche aus der selben / mit eigener Hand aus-  
gezeichnet habe. Lies darauff den Schreiber holen / seine  
Handschrift / Wie er aus den 4. grossen / vnd 12. kleinen  
Propheten / die herrligsten Busapredigten / vnd Trosts-  
sprüche ausgezeichnet / Vnd darneben die fürsnehmste sprü-  
che aus den Episteln S. Pauli an die Römer / Corinthier /  
Thessalonicher. Neben der heiligen Schrifft hat er die  
Tomes

Tomos Lutheri/ vnd etliche Historicos/ auch mit fleis ge-  
lesen/ vnd gerne dauon geredet.

Am tage der Himmelfahrt vnfers H Erren Ihesu  
Christi/ da ich in erinnerte der wolthaten/ so vns durch des  
H Erren Christi Himmelfahrt erworben weren/ Vnd aus  
dem 14. Caplt. Johannis im sagte/ von den Wonungen/  
darzu der H Err Christus vns den Weg eroffnet / vnd die  
Ban gebrochen mit seiner Auffahrt/ Sagte er/ Ja das ist  
sehr eröstlich/ Ich hab mirs heute auch aus der Postill Lu-  
theri vorlesen lassen/ vnd wels das es mir auch zu gute ge-  
schehen ist.

Bi den Abent nach 8. vhren/ begert er ich solte im zu  
guter nacht einen Trost spruch sagen/ so wolt er mir denn  
verleuben helmzuehen.

Darauff saget ich/ Ja weil er wüste / was vns der  
H Err Christus / für wolthat mit seiner Himmelfahrt er-  
worben het / so wolt ich ime ein Spruch oder zweene/ die  
mit dem heutigen Fest vnd desselben Neubelere vber ein  
kamen/ zu guter nacht lassen. Solte derwegen mercken/  
die Worte aus der Epistel an die Ebreer am 13. Capitel:  
Ihesus Christus gestern vnd heute/ vnd der selbe auch in  
ewigkeit. Dieser H Err/ hat sich nu nach seiner Mensch-  
heit gesetzt/ zur rechten der Rechstedi Gottes/ seines him-  
lischen Vaters/ vnd saget zu / allen seinen glaubigen Chri-  
sten / Matthei 28. Ich bin bey euch alle tage/ bis an der  
Welt ende. Johannis 14. Ich wil euch nicht Wassen  
lassen. Vnd im 91. Psalm/ Ich bin bey im in der not/  
ich wil in heraus reissen vnd zu ehren machen/ ich wil in  
seeligen mit langem Leben/ vnd wil im zeigen mein Hell.  
Diesen H Errn / sprach ich/ Habt vnd behaltet euch helmt  
zu guter nacht/ der wird auch bey euch sein / vnd bleiben/  
wenn jr in nöthiget mit ewrem Gebet / Luce 24. H Err  
D Iij. bleib

bleib bey vns denn es will abend werden / vnd der tag hat sich geneiget / hienit hab ich in gesegnet / vnd bin von im gangen.

Folgendes tages früe halbweg funffen / bin ich widerumb zu im komen / vnd in des nechtigen abschleds erinnert welchen er in frischem gedechtnis gehabt / vnd gesagt / das er sich die nacht vber / weil er nicht geschlafen / damit getröstet hette.

Darauff ich weiter zum guten morgen in erinnerte / der Worte Jeremie Thren. 3. Cap. Die güte des HErrn ist / das wir nicht gar aus seind / seine Barmherzigkeit hat noch kein ende / sondern sie ist alle morgen new / vnd seine trew ist gros. Dieser gnedige vnd Barmherzige HErr / ( sagte ich ) wird euch in ewrer grossen not auch zu hülffe kommen.

Vnd weil ich sahe das er von wegen der Anmachten / sehr matt war / führete ich im zu gemüte / seine Trostsprüche / Johan 3. 1. Tim. 1. Joh. 8. Rom. 8. Welche droben erzelet sind / vnd fragete in drauff ob er bey diesem Glauben vnd Bekenntnis von dem HErrn Christo / gedechte zu bleiben / zu Leben vnd zu Sterben / Da antwortet er laut / das alle so da waren / es Höreten / Ja / das ist mein Intent vnd meinunge / darbey will ich bleiben / mit Gottes hülff / vnd weil ich den trost nicht hette in meiner Schwachheit / Was wolt ich machen? vñ ich bleib nachmals bey meiner vorligen erklerungen / die ich etlich mal gegen euch gethan habe / Wenn es meines lieben Gottes wille were / vnd wolte mich von dieser meiner grossen schwachheit erretten / vnd noch ein zeitlang hie lassen / das ich meine Sachen ein wenig richtig machen könnte / vnd ein klein gut haben möchte / da ich fride hette / vnd köndte zu Kirchen gehen / Besen / vnd meine Bibel lesen / so wolte ich dem lieben Gote dafür /

Dafür / herzlich Lob vnd danck sagen / Wil mich aber / der  
liebe Gott / hiedurch abfordern / So geschehe sein wil. Das  
höret da mein liebes Weib / vnd meine liebe Mutter. Vnd  
dabey bleibe es.

Vnd weil er melnete es begünzte ihn zu Schlessern /  
vnd ich Amptshalben zu thun hatte / befahl ich in dem lieben  
Gott / vnd nam mein abscheit / Also das ich nach verrich-  
tung meines Ampts / etwa vmb 9. vhr wolte widerumb zu  
im komen / darumb er fleissig bade. Aber in dessen / etwa vber  
zwo stunden / war er wie ein Lecht mit sanfftem seuffzen /  
ohne alle bewegunge / ausgeleschet / vnd selig im HErrn  
entschlaffen.

Der Almechtige Gott verleyhe im eine fröliche  
Aufferstehung / zur Seligkeit vnd ewigem Le-  
ben / AMEN.



Faint, illegible text, likely bleed-through from the reverse side of the page.



78 L 1831

ULB Halle  
004 717 740


3



f

56.





A. 124.

**Einconis Lobgesang/  
Lut. 2.**

**Kurz ausgelegt:**

**Hey der Christlichen  
Begrebnus/des Edlen/Ehrnuesten  
vnd gestrengen LVDOLFS  
von Schaderitz.**

**Am Contag Exaudi den 12. May/  
Anno 1583.**

**Durch**

**M. Hieronymum Mencesium Mars,  
feldischen Superintendenten:**



**Gedruckt zu Eisleben durch  
Andream Petri.**

